

(Nunalerinermut, Imminut Pilersornermut, Nukissiutitut Avatangiisinullu Naalakkersuisoq)

**Kalaallit Nunaata eqqaani imartani aningaasaqarnikkut immikkut oqartussaaffigisani avatangiisit illersorneqarnissaat pillugu inatsisip allanngortinneqarneranik inatsisissatut siunnersuummik Namminersorlutik Oqartussat ilaliinissaat pillugu Inatsisartut aalajangiiffigisassaattut siunnersuut**

(Nunalerinermut, Imminut Pilersornermut, Nukissiutitut Avatangiisinullu Naalakkersuisoq)

**Saqqummiussissut**

(Nunalerinermut, Imminut Pilersornermut, Nukissiutitut Avatangiisinullu Naalakkersuisoq)

**Siullermeerneqarnera**

Siunnersuut Naalagaaffimmi oqartussaasut Kalaallit Nunaata eqqaani imartani aningaasaqarnikkut immikkut oqartussaaffigisani avatangiisit illersorneqarnissaat pillugu inatsisip allanngortinneqarneranik inatsisissatut siunnersuummik Inatsisartut akuersinissaannik qinnuteqarnerannut tunngasuvoq. Siunnersuut UKA2023-mi suliarineqarpoq (imm. 36), siunnersuullu Inatsisartunit akuerineqarluni.

Kingornali inatsisissatut siunnersuummi allannguisoqarpoq Inatsisartunit akuerineqarsimangitsunik. Inatsisissatut siunnersuutip saqqummiuteqqinneqarneranut pissutaavoq pisinnaatitsissummik aalajangersakkamik siammaseersumik Danmarkimi oqartussaasut annertusaasimanerat, Kalaallit Nunaata eqqaani imartani aningaasaqarnikkut immikkut oqartussaaffigisani umiarsuarnik isaterisarnermut aamma maleruagassanik atuutilersitsisoqarsinnaangorlugu.

Pisinnaatitsissummik aalajangersakkap annertusarneqarnera Naalagaaffimmi oqartussaasunit ingerlanneqarpoq inatsisissatut siunnersuutip siulliup UKA2023-mi Inatsisartunit saqqummiunneqarnerata kingorna. Paatsoortoqarsimanera pissutigalugu inatsisissatut siunnersuutip allanngortinneqarnerata Inatsisartunit akuerineqarnissaa Naalagaaffimmi oqartussaasunit qinnutigineqarsimangilaq. Tamannalu pissutigalugu inatsisissatut siunnersuutip annertusarneqarnera umiarsuarnik isaterisarnermut tunngasoq Inatsisartunit akuerineqarsimangilaq. Taamaattumik inatsisissatut siunnersuut Inatsisartunit saqqummiuteqqinneqassaaq.

Umiarsuarnik isaterisarneq pillugu maleruagassat Hong Kongimi nunat tamalaat isumaqatigiissutaanneersuupput juunip 26-ani 2025-mi atuutilertussat. Nunat tamalaat isumaqatigiissutaanni ilaatigut piumasaqaatigineqarpoq umiarsuit 500 bruttotonnage sinnerlugit usitussuseqartut akuutissanut navianartunut umiarsuup atortuiniittunut sananeqaataaniittunulluunniit, soorlu asbestimut, saffiugassanut oqimaatsunut aamma akuutissanut ozonimut akornutaasunut allattorsimaffeqassasut. Pisinnaatitsissut annertusisq pisariaqarpoq, Hong Kongimi nunani tamalaani isumaqatigiissummut tunngatillugu Kalaallit Nunaannut nunamut akisussaaffeqarfimmut tunuarsimaarfeqarnerup atorunnaarsinneqarnissaa Inatsisartunit 2021-mi ukiakkut ataatsimiinnermi aalajangerneqarmat.

Maanna siunnersuutigineqarpoq inatsisissatut siunnersuummut allannguutaasoq, umiarsuarnik isaterisarnermut maleruagassiornissamut pisinnaatitsissummik imaqartoq Inatsisartunit akuerineqassasoq. Taamaaliornikkut Hong Kongimi nunani tamalaani isumaqatigiissummi

maleruagassat Kalaallit Nunaata eqqaani imartani aningaasaqarnikkut immikkut oqartussaaffigisani naammassineqarsinnaangussammata.

Siunnersuutip matuma akuerineqarneratigut Kalaallit Nunaata eqqaani **imartani aningaasaqarnikkut immikkut oqartussaaffigisani** imaani avatangiisit pillugit maleruagassat nutarterneqarnissaat qulakkeerneqassaaq, tamannalu Hong Kongimi nunani tamalaani isumaqatigiissummut tunngatillugu Kalaallit Nunaannut nunamut akisussaaffeqarfimmut tunuarsimaarfeqarnerup atorunnaarsinneqarneranik Inatsisartut aalajangiinerannut naapertuutissaaq.

Taama oqaaseqarlunga siunnersuut Inatsisartuni piumassuseqartumik suliassangortippara.